

Zehnder die Stundlinien darein zubringen/so gang in die hievor gesetzte Täflein in 2. oder 3. Cap. beschriben/ vnd nimb abermahlen deines Lands *Polus* höche/ als hie 47. gr. zur 12. stund im anfang des Krebs/ item zur 12. stund im anfang des Widens vnd der Wag/ vnd zur 12. stund im anfang des Steinbocks/ auff ein jeden gefundenen grad vnd minuten/ leg allwegen ein Lineal/ vnd auff das *Centrum A.* vnd wo die *Tropici* der fürgenommen zeichen durchschneiden werden/ mach pünctlein/ zeuch dann allwegen je 3. vnd 3. puncten mit einem Circelriß zusammen/ in massen im 2. Cap. vom Cylinder gelehrt wirt/ oder gang in das Erste Theil zur 6. auffgab/ daselbst wirst bericht finden/ wie mit einem Circelriß 3. puncten zusammen zufassen.

In aller form vnd gestalt/ wie mit der 12. stund gehandelt hast/ also verhalt dich mit allen anderen stunden/ es ist aber hieben wahrzunutzen/ wo dz Instrumentlein klein wirt/ ist nit vonnöten/ das auff allen zeichen linien punctiert werde/ wie im grossen/ sondern man mag sich allein der dreien Circulen der Sonnenwende benügen/ als Krebs/ Widen/ Wag/ vnd des Steinbocks.

Es sind mir zwar sonst andere *Quadranten* zukommen/ in welchen der Thierkreis/ im Mittägigen Litterlein nit auff vorgende form beschriben/ außtheilt war/ sondern nach gefallen/ der Steinbock Circel ohngefahr/ vom Krebs Circel ist gesetzt worden/ vnd hernach die linien *A. B.* oder *A. G.* zwischem Steinbock vnd Krebs ist halbiert worden/ welches dann der Circel des widens vnd der Wag geben/ die übrigen zeichen vnd grad/ sind auß einem außgetheilten dreispizigen *Zodiac* nach ihrer proportion vnd größe des Instruments außgetragen worden/ vnd folgens die Stundlinien/ wie oben anweisung geben/ darein verzeichnet/ welcher *Quadrant* auff dise manier außgerissen/ ineracht wol zugetroffen/ magst aber eins vnd das ander probieren/ vnd dann dem besten weg nachfolgen.

Dise Meß Litteren *Scala Altimetra* genampft/ außzutheilen/ ist solches ein iustie vierung/ in einem iusten vnd gerechten winckel gerissen/ dessen spiz oder Eggen/ geht durch den 45. grad im Circelbogen des *Quadranten*, da mögent die senten nach einßen gefallen/ in gleiche *partes* oder theil *dividiert* werden/ je mehr der theilen sie hat/ je besser vnd genäwer man zukompt/